

Aenfaengx Rang-fwtfwt Heuswdswd

□ Veiz Sah sij / Vangz Gyanghmyauz hoiz

Seiq nyied cobet “Ciet Duzvaiz” vunzlai gangjgangj riuriu, sing cienz youq ndaw lueg iqet neix, lumj raemxmok sanq mbouj bae, daxmeh swiq cingh aen rekdiethung, swxduk ndaw ranzdajcawj gyuek faenx haenx. Naeuz dwg yaek daengz Ngux Nyied Co’ngux, ndaw ranz rog ranz cungj yaek baet seuq bae, daengz seiz le dumq rek faengxdaeuh ndeu, baenz-neix cij engq hawj vunz sim’angq ne.

Dingq daengz gij vah neix, gou lumjnaeuz yawjraen baenz caz baenz caz rongfaengx yot raez maj sang, dingqny i rek faengx homswdswd ndeu goenjhuu, caeuq nyoudaengz gij heiqrang mbawrong caeuq ganj rienghaeux.

Doiq gou daeuj gangj, ngeix daengz Ngux Nyied Co’ngux, engq lai dwg ngeix daengz ngaueuz baihlaeng boux vunz ndeu, gyoengq vunz ndeu, goengq bya mwncup ndeu, gyoengq beixnuengx ranzmbanj ciuhvunz ngoenznaengz youq ndaw bya simhai najyungz, youq ndaw mbanj cwxcaih youqlag.

Siujmuenx gvaqlaeng, gova go-nywj mwncum rangfwt. Miz vunz daengngoengz caengz ok couh hwnq-daeuj, ranz yied daeuj yied rongh, coemh gaem fiengz ndeu, hoenz mbinmiegmieg ndit haindu j ronghsag, daeuh baenz dong yiengq coh daengngoengz, nyengq roengzdaeuj, seizhah bya heu raemx saw haenx daeuj daengz lo.

Lwgfeiz riengz goengq bya baihsae doek roengzdaeuj, raemx-daeuh daj baengzsa maedsaed lae roengzdaeuj, cimq gij haeuxcid ndaw buenz luenzlu raengnwn. Raemx dwg raemxgoenj, daeuh dwg daeuh fiengz. Raemxdaeuh caeuq haeuxcid dox-yungz seiz, fwi swng hwnjdaeuj, nyinh aen ndang gou dumz lo.

Daxmeh riuj aen swx byaij okbae, gwnz hwet raek aen loengzcax ndeu, faglienx doxbungq yienggyatgyat sing riengz de itloh cienz bae. Dou byaij daengz gwnz ndoi diegsang, youh riengz ndoengcuk roengz laj lingq bae, ginggvaq cib leix vahaeux, ginggvaq giuzfaex, ndoenggyoi, riengz henz

mieng byaij coh baihbaek, doeklaeng byaij haeuj ndaw caz rongfaengx bae. Youq gwnz roen neix, gou dingqny i sing duzgoep diuqyetyet saet roengz ndaw naz, hix siengj gwn makseq baenz naed baenz naed deihaen-yaen hoengyenyen venj youq gwnz gomakseq.

Byaij daengz dieg, rongfaengx heuswdswd youq dangqnaj gou, mbawmbaw maj coh baihgwnz, hohhoh daengjvidvid, baenz caz baenz caz sang miz saek mij youq henz nienjraemx, mbaw rongfaengx hung lumj fajfwngz sohnengneng, heuseuseu, youq gwnz diegnamh maj bae yawj mbouj raen henz. Gou caeuq daxmeh couh byaij youq ndaw caz rongfaengx, genjaeu mbawrong hung doxlumj, saek yiengh ndei yawj, gwnz-gyaeuj ndit ronghgywggywg, henzrwz raemx laesasa, dauqcawq caemrgrwg. Yaepyet, ndaw swxduk mbawrong couh doxdaeb rimrwdrd lo.

Dou riengz loh gaeuq dauqma, byaij youq henz diuz mieng gaebgeb ngamq ndaej cuengq song faj din, yamq bae riengjret, lumjnaeuz byaij youq gwnz roen gvangqlangh bingz-bwd nei. Bae seiz raen roen hoj byaij, dauqma sim’angq najhai. Haeuxcid gaenq youq ndaw raemxdaeuh ndongqndikndik, suek faengx yaek yungh daengz duhhau, duhbenj, daxmeh gaenq baez yiengh baez yiengh coq haeuj ndaw rek bae aeu feiziq saz, gou hen youq baksaeuq yawj feiz, daxmeh guhmuengz dawz aen nyaqgve ndeu, youh bae daengz henzdah swiq mbawrong lo. Nyaqgve dwg aeu lwggve ndaw ranz gag ndaem daeuj guh, caj lwggve cug, naenggve bienq henj, baihndaw ro geq liux mbaet bae, aeu nohgve, ngveih, aeu ngveih daeuj guh cehgve, nohgve cix aeu daeuj guh gaiq swiq vanj swiq rek. Youq ndaw swyenz, mboujdan miz lwgduh, haeuxgok doengh gijneix aeu naed ngveih baihndaw hawj raeuz gwn yungh, lij miz aen lwggve yienghneix geq liux, bang raeuz baet cingh namhfaenx. Gyoengq beixnuengx ranzmbanj youq Minzduong Cunh haenx, cingq baengh dongh gova

go’nywj ndoengfaex neix raeuj ndang, ganqciengx, menhmenh majhung.

Haeuxcid gaenq dauqcungz swiq cingh, youq ndaw swxduk ndik raemx hawq, noh, duhhau, duhbenj gak cungj liuh ndei hix bwh caezcup. Cawzliux noh heh baenz gaiq seiq fueng, daxmeh youq ndaw batlij dawz doengh gij lwgduh loq cug neix caeuq haeuxcid doxgyaux, coq di gyu ndeu, gyaux yinz bae. Gwnz batlij saekhoengz, saekhou, saekheu, saekhenj doxcuiq doxingj, singisien yienhda. Cungj batlij vava loegloeg coux doxgaiq neix henz mbanj ca mbouj lai ranzranz cungj bwh miz, gij va singisien neix gangj ok gij maqmuengh vunzlai, muengh ndwenngoengz coglaeng gyaunde i vuenyungz.

Doeklaeng, daxmeh youh aeu aen ndoengj daezgonq swiq cingh haenx daeuj, gig suglienx dawz aen batlij, aen vanj iq cang noh, ganj riengzhaeux, mbawrong ndik raemx hawq baez yiengh baez yiengh cuengq hwnjbae. Daxmeh naeuz, cungj baij youq ndaw ndoengj luenz, suek faengx seiz yungh daengz couh fuengbienh, hix ndaej coux gij haeuxcid mbouj siujsim doek okdaeuj haenx, mbouj vaih haeux. 《Seiging Daihdoeng》 naeuz: “Bojsingh baihnanz, mbouj ndaej vad raemz, doujsingh baihbaek, mbouj ndaej daek laeuj.” Ndw sei “boj” “doug” cungj dwg gij coh singhco ciuhgeq, yienzbonj eiqsei dwg aendajcaeng. Aen ndoengj luenz daxmeh yungh haenx cix dwg yiengh doxgaiq mizok haemh moq, bingzciengz, daxmeh aeu daeuj raeng haeux vad raemz, dak byaek rengj, lauxbaeg rengj doengh gijneix, aenndoengj yunghcawq lai raeuh, geq mbouj rox liux.

Yienghyiengh bwh ndei le, daxmeh vaiqv i yot ok song mbaw rongfaengx, baihlaeng mbawrong doxgap, daeb baenz aenlaeuh sam gak, sien cang dingznoix haeuxcid caeuq lwgduh, coq gaiq noh seiq gak iq ndeu, caiq dienz rim dieghoengq rongfaengx. Daxmeh daeb mbawrong geij baez le, ganj riengzhaeux heux geij gien, aen

faengx yiengh sam limquengq couh suek baenz lo. Baezbaez daxmeh song fwnz suglienx suek faengx, gou cijaeu youq ranz, couh itdingh youq henz ciuq hag riengz guh. Hoeng baenzlai bi lo, mboujguenj gou hag geijlai baez, mboujguenj daxmeh baenzlawz naihsim son gou gujli gou, gou baez ndeu ceiq lai cij ndaej suek baenz saek aen song aen faengx. Baenzneix, gou cijnde i youq henz bang raed mbawrong, ganj riengzhaeux lai yawz haenx, youq aen rekdiethung baihlaj gya fwnz dumq faengx.

Gaenq daengz banringz, seiqhenz yaepyet bienq caemrikrik. Gwnz gosamoeg bakdou ranz saek seiz miz geij sing bid ciuz cienz daeuj, ndoengcuk haenzdah ngauzngednged, fwnz ndaw saeuq dekbyanbyan, caeuq daxmeh daek haeuxcid aensieg ngad batlij yiengjgvatgvat……Gou rox, neix dwg gij sing aen mbanj gag miz, gij sing angqyangz neix dwg gyoengq beixnuengx ranzmbanj aeu ndoengfaex, gohaeux dajndaem dajciengx cij vuenh ndaej. Doenghgo doenghduz dinghdingh majhung, hix ndaej hoenghhdw swyouz youq ndaw mbanj cuengq sing ciengq go.

Aenfaengx cimq youq ndaw raemxgoenj, dumq ndaej sam seiq diemj cung, gij heiqrang mbawrong senq iemq haeuj ndaw faengx bae. Raemxlae, raemxraiz, nywjfaex, gohaeux, doengh gijneix gyoengq vunzmbanj ngoenznaengz yawj gvenq haenx, deng mbawrong duk maenhmwd, ndawde duk miz gij vahdaengq bohme, duk miz Cunghvaz geij cien bi vwnzva gihyinh, caez haeuj daengz ndaw dungx raeuz, lae youq ndaw ndang raeuz.

Raemx goenjbwdbwd, gou raen gij raemx goenj ndaw rekdiethai ok duj dem duj va hau hungloet. Varaemx hai baenz duj baenz duj, ndatfoegfoeg muenx aen dem aen faengx, youh sanq bae. Daengz Ngux Nyied Co’ngux lo, youq gizneix dauqcawq dwg hei q faengx rangfwtfwt, gou dingqny i aen ndang gou laeglemx maj ok saekheu, lumj baenz nyup baenz nyup rongfaengx henz nienjraemx neix.